

الأحد 2008-04-06

219- الاشراف على العلاج النفسى (6)

التدريب عن بعد

الاشراف على العلاج النفسى (6)

تفاصيل الواقع، والتعاطف الخذر...!

د. فوزى شحاتة: صباح الخير "....." هي عيانه عندها 28 سنه خريجة تجاره، بتشتغل صاحبة شركة شحن، ليها أخين، كانت جت من حوالى سنه ونص وقعدت 5 شهور، وقطعت.

د. يحيى: جاتلك مباشرة، ولا أنا حولتها لك.

د. فوزى شحاتة: لأ عن طريق عيانه كنت بعالجها، قعدت 5 شهور او 6 شهور وبعد كده قطعت، وبعد كده رجعت تانى من حوالى 3 شهور فى خلال الـ 5 شهور الأوليين كانت بتيجى مرتين فى الاسبوع

د. يحيى: ابوها بيشتغل ايه ؟

د. فوزى شحاتة: ابوها كان بيشتغل مقاول، بس زى ما يكون تقاعد كده، بيشتغل قليل دلوقتى

د. يحيى: ترتيبها إيه فى اخواتها؟

د. فوزى شحاتة: هي اكبر اخوتها هي من منطقة شعبية، وهي بنت عادية خالص، وكانت اشتغلت فى شركه قعدت فيها 4 سنين، اتعلمت الشغلانه، فراحت فتحت شركه شرك مع اتنين كمان، بعد سنتين الشركه الجديده دى زى ماتكون وقعت، هي شالت الشركه بخسايها، يعنى اخدت الخسائر قصاد انها تاخذ الشركه لوحدها.

هي لما جت فى الأول الشكوى بتاعتها كلها كانت حاجات جسدية، وكده فى الاتجاه ده، وكانت بتروح لدكاترة باطنه ودكاترة عظام كانوا بيدوها مسكنات، فكانت زى ما يكون فى الـ 5 شهور اللى قعدتهم معايبا، كانت دائما الحاجات سخنه طول الوقت، وانا ما كونتش باعرف اعمل حاجه غير ان انا اعمل لها دغم وأف جنبها، وأحاول أفهم وبس، وهي كانت مانعاني تقريبا ان انا اقبل تقريبا حد من أهلها، كانت مش عايزه تقوللهم خالص انها بتتعالج. قعدت الـ 5 شهور دول وقطعت،

ورجعت تانى، فى الـ 5 شهور دول كانت هى مخطوبه لواحد كان متدين، وكان بيشتغل عندها فى الشركة، كان موظف تحت اديها فى الشركة، وكان متدين قوى، فكانت هى محببة، وكانت ملتزمة قوى فى الوقت ده، لما رجعت تانى بعدما قطعت رجعت مش محببه وكانت فكت خطوبتها مع خطيبها، وعملت علاقه جديدة، يعنى برضه المرة التانيه ديه اكتشفت فيها انها فى الشركه الأولانية اللي كانت فيها كان المدير بيتحرش بيها، وبعدين كانت عامله علاقه لمدة 4 سنين مع صاحب الشركة، علاقه يعنى علاقه متينة، بس ماکملتشى.

د. يحيى : ايه بقى المشكله؟

د. فوزى شحاتة : انا مشكلتى معاها إن انا طول الوقت متعاطف معاها ، وفى نفس الوقت مش عارف أحرك حاجه فيها فى اتجاه العلاج، مش عارف آخذ موقف غير التعاطف، قصاد موقفى ده باشوف أى حد من اللي حوالىها بالاقى موقفه مش كده خالص، هى تقريبا مسئوله ماديا عن بيتها كله، تقريبا بتصرف على البيت من حوالى 6-7 سنين، يعنى حتى من أيام ما كانت بتشتغل بس مش صاحبة شركة، هى دلوقتى الشركه بتاعتها عليها مشاكل ماديه كبيره قوى، قضايا وشيكات وحاجات كده، يعنى تقريبا حاتدخل السجن، وسالفة من خالتها فلوس بضمن امها، وعاملها مشاكل انها لازم ترد الفلوس، حوالى 70-80 الف جنيه ، موقف امها وحش منها طول الوقت وطول الوقت بتقولها انت غرقتينا، وانت اللي ودتينا فى داهيه، بالرغم انها بتصرف عليهم ومعيشاهم حتى فى مستوى اعلى من اللي كانوا طول عمرهم عايشين فيه، وهى لها اخ اصغر منها ما بيشتغلش، يعنى خلص وما بيشتغلش، وهى برضه بتصرف عليه، أى حد فى المحيط بتاعها من اللي بيشتغلوا لو محاسب ولا حمامى او كده بلاقيه بيستغلها، يعنى دايمًا تيجى تقول مثلا إن المحاسب عمل كذا، ودخلنى فى موضوع كذا، وبعد كده سابنى ما عملش حاجه، الثلاث اربع محامين يستغلوها وما يكملوش معاها، حتى القضية الأخرانية بتاعت الشيك دى الحمامى وعدها ان هو جيل القضية وزى ما يكون يعنى خد موقف كده انه كان ينفع يعمل حاجه تسهل الموضوع وتعمل تصالح، لكن بعد شويه قالها لأنا حاسيبلك القضية وكده، خد ما اتحكم عليها، خطيبها الأولانى دا ، يعنى لما كان خاطبها، هو الوحيد اللي قدرت اقباله مرة واحدة بس، كان موقفه منها وحش برضه، هى كانت فى الفترة الأولانية اللي كانت بتيجى فيها كانت بتأخذ حبوب، كانت يعنى بتأخذ بكميات، وفى ساعات كانت بتأخذ بنية الانتحار، يعنى فيه مره منهم كنت بعثها هنا المستشفى عشان تدخل فزيميلتى "د." قابلتها وقابلت مامتها أيامها، وقالت لى إن مامتها طيبه، ومش بالشكل اللي هى بتوصفها بيه، يعنى مش زى ما انا قولت لزيميلتى يعنى ان مامتها صعب قوى، وانها بتضغط عليها طول الوقت

فى الفترة اللي هى سابتنى فيها دى كان بيجيلها دكتور من العباسيه كانت بتقول ان هو ما عندوش عياده، فكان

بيروح لها المكتب يعملها علاج نفسى هناك فى الشركة بتاعتها، دى فتره حوالى 4 شهور،

د. يحيى: طيب وده ينفع؟

د. فوزى شحاتة: ما أظنش، بيتهيألى لأ ماينفعشى

د. يحيى: طبعاً لأه، العلاج النفسى مش توصيل الطلبات للمنازل

د. فوزى شحاتة: إالى حصل

د. يحيى: وبعدين؟

د. فوزى شحاتة: بس انا لقيت نفسى فى زنقة لما رجعت تانى، انا موقفى بقى اقوى شويه وبقيت باحاول اوقف معاها يعنى، مثلاً العلاقه اللى هى فيها دى دلوقتى شايف برضه ان فيها استغلال من الطرف التانى، فباحاول انى اخليها توقف، تحاول تواجهه، وكده، وهى بقت برضه منزعه من الموقف بتاعى ده، لكن انا برضه فى نفس الحته المتعاطفة، وبرضه مش فاهم ليه هى دايماً الدنيا واقفه ضدها فى كل الاتجاهات كده، وان اللى حواليتها ماحده منهم بيتعاطف معاها خالص، وانا المتعاطف معاها بس يعنى.

د. يحيى: السؤال بقى إيه ؟

د. فوزى شحاتة: السؤال هو عن الفرق بين موقفى وموقف اللى حواليتها كلهم، ده انا مش فاهمه، وعائز أعرف هوأ صح كده؟

د. يحيى: خلى بالك ان مش انا اللى حولتها لك، تبقى العلاقه على مئيه بيضاء، بصراحة حاله صعبه، يعنى الكلام كده فيه تناقض داخلى، وبرضه ظاهرى، الحاجات ملخبطة، يعنى هى مستلفه، وحاطش السجن، وهى اللى بتصرف على اهلها، دا إيه ده!! بتصرف على اهلها من الشيكات اللى من غير رصيد!! وعندها 28 سنه!! وعندها كل التاريخ ده من النجاح والفشل، والنجاح والفشل، والنجاح والفشل فى كل المجالات، ففيه حاجه فى الحدوته على بعضها، حاجه جامده يعنى، الحكاية مش واضحة، انا ما باعرفش الأسمى دى بتاعة البنس والكلام ده، لكن باين المسأله صعبه.

د. فوزى شحاتة: انا شاك ان اخوها التانى يعنى بيستغلها برضه كده على خفيف، ده من الوصف اللى هى وصفته

د. يحيى: انا اظن كده، عموماً المعلومات مش كافيها إنها تخليك تاخذ موقف أحسن من اللى انت واخده، حتى إذا كنت بتشوفها مرتين أسبوعياً لمدة 5 شهور، وبعدين 3 شهور انقطاع وبعدين رجعت دلوقتى والمشاكل عماله بتزيد، تلاحظ إن العمليات الخارجيه اللى هيه مش مرض مرض، بقت اكبر من مسئوليتنا المباشرة، المسأله بقت فيها سجن وقضايا، وتفليسه، وتهديد، المسائل الواقعيه دى لازم بتتحسب بالورقه والقلم، دى اكبر من العلاج النفسى والكلام ده، انت بتقعد

معها ساعة بتتكلما في إيه؟ في الفلوس ولا في العيَا؟ ثم مش احنا قلنا إن احنا بنتقمص الموقف عشان نفهم أحسن؟! هل تصورت نفسك مطرحها وهى عندها 28 سنه، انت عندك كام سنة؟

د. فوزى شحاتة: 31 سنة

د. يحيى: طب تصور انت كده من 3 سنين يا بنى وعندك كل الهالوته، دى يبقى الوضع ايه؟ الهالوته المادية أساسا مش الهالوته النفسيه، دى حاجه مزعجه جدا، انا علاقتي بالحاجات دى طول عمرها صعبه خالص، انا عمرى ما أخذت قرش من بنك، ولا عمري اعرف استلف ولا عمري اعرف اسلف، ولا اعرف في الحاجات دى، أنا دايمًا مرعوب كده وماليش دعوه بالحكوميه ولا بالناس بتوع الفلوس، اللي بيحيروني في حكاية السلف والمغامرات اللي بيعملوها دى، يمكن عشان كده مش قادر أتقمصها وافهم اللخيطة بتاعتها دى كلها، انا ما بافهمش الناس الكبار اللي بيقولوا استلف مش عارف كام 100 مليون وهرب، ليه الغلبان ده ليه بيستلف؟ ويقولك دى شطارة انه ما بيسدش، انا مش عارف يعنى إيه شطارته انه ما بيسدش، دى شطاره ولا خيبة؟ أنا مش عارف هوه بينام ازاي ده

د. فوزى شحاتة: هى بتقول ان ده شائع في الشركات دلوقتي

د. يحيى: أنا ما بفهمهاش يابنى والله العظيم، أعمل إيه ؟ عشان كده مش قادر استوعب الحالة، أنا يكون عليا 16 جنيه أقعد قلقان لحد ما اخلت حد يوديهم البنك في خلال 24 ساعه، احترام الاختلاف ده يخليك حريص على إنك تتعلم من اخطوته دى، تخليك تفترض إنها يكون ليها خبره بالواقع أحسن منّا، احنا بنتعلم من عيائنا في المجالات اللي مالناش خبرة فيها عشان نقدر نساعدهم ونفهم العيائين اللي بعدهم، المعلومات الواقعية اللي تقدر تقيس بيها العيان وأحواله وتفاعلاته ضروريه في العلاج النفسى، المسألة مش كلام في كلام ساعة في الأسبوع وخلص، انت لما تعرف التفاصيل، من ناحيه حاتتعلم منها، ومن ناحيه حاتقدر تقيم المسألة، ما يجوز كل السلف ده نجاح، حد مرّه قالى: إن رجل الأعمال اللي مش سالف ما يبقاش ناجح، عشان هؤا بيستلف مثلا بـ 10% مثلا لازم يطلع 20% كده يبقى ناجح، فيستلف بقى كتيرقوى عشان يبقى الفرق كتير قوى، وكلام من ده، إنما أنا ماجربتش، ومش حاجزب، أنا ما أفدرشى اعملها،

تيجى بقى لعملية إنها بنت، وحكايتها مع الرئيس الأولان، والمش عارف ايه، وهى دلوقتي عندها 28 سنه، الحاجات دى تدخلنا في المنطقه اللي تبعنا أكثر، تسهل لنا إننا نفهم أكثر وأكثر، التصرفات دى يا مرضية، يا أخلاقية، وفيه وصلة بينهم، إنت بتعرضها علينا في الاشراف دلوقتي عشان تقولنا ازاي انت متعاطف معاه، وغيرك مش متعاطف؟ مش كده، حكاية استغلالها الأولان مثلا انا سمعتها على إنها بدأت بحاجه زى التحرش، انا مش عارف يعنى ايه تحرش لحد دلوقتي، خصوصا بعد الجدع وزير خارجية باكستان ما تحرش بكونداليزا رايس، قريت

الخبر ده ولا لأ؟ هو راجل فاهم نفسه فيك كده يعني فقام بص لها بصة زيادة مش عارف ولا إيه، وهو الظاهر معروف عنه حاجات من دى، فافضحوه في اوروبا، وانا مش عارف ازاي شخصوا البصه دى انها تحرش، أهو اللي حصل، قالوا تحرش، وهو باين بص لرجليها، مع إن متصور إن رجليها وحشه، وأنا مش متأكد هو بص لأهي حته فيها، أنا رأي إنها شخصيا اوحش من رجليها، ولا ماخدتش بالك

د. فوزى شحاتة: ماخدتش بالى

د. يحيى: أنا باقولك الكلام ده ليه، عشان تاخد بالك إن الكلمات ساعات بيبقى لها معاني مختلفة عند ثقافات مختلفة، لازم تدقق وتحش في التفاصيل، إنت عارف تحرش - مثلا- يعنى إيه، ولا زي، طيب هناك لو مافيش تحرش ومافيش بصصان، امال حياصحابها ازاي من غير ما يتحرش يعنى هو لازم يكتبلها: وتفضلوا سيادتكم بقبول فائق التحرش، ما هو الحاجات اللي احنا مش فاهمينها عموما أو خصوصا، نقف عندها ونتعلم، احنا لازم نعرف باللى مش فاهمينه زى ما نفرح باللى فاهمينه، فا إزاي الست بتاعتك دى عماله تعمل البيزنس ده كله والناس بيستغلوها ماديًا، وبيتحرشوا بيها، وبيحاولوا يستغلوها جنسيا وخصوصا انها كانت عامله علاقه مع رئيسها، ومش عارف ايه، والله اعلم فيه إيه تانى.

د. فوزى شحاتة: لأ بره التلات علاقات دى، بره الخطوبه والعلاقتين دول اللي هي الأولانية، واللى موجودة دلوقتى، لأ ما فيش حاجه

د. يحيى: هي أساسا بتحصل على احتياجاتها العاطفية الأساسية منين، باقول العاطفية، بلاش الجنسية دلوقتى.

د. فوزى شحاتة: ما هي علاقه الأولانية دى كانت بتعمل اللزيم ، ... يعنى !

د. يحيى: بس دى خلاص، ماخلصت

د. فوزى شحاتة: ماهو جزء من اللي حاصل دلوقتى انها مافيش حد بيديها حاجة، يعنى احتياجاتها فاتحة عالآخر.

د. يحيى: طب ما هي دى عملية أساسيه في العلاج، خلى المشاكل الواقعية اللي مانعرفش فيها على جنب شوية دلوقتى لخد ما نعرف عنها أكثر، يبقى حانلاقى نفسنا في المنطقة بتاعتنا أكثر وأكثر، يمكن دا اللي مخليك تتعاطف معاها كده، لانك حاسس انك انت المصدر النضيف اللي تقدر تغذى الحته النضيفه اللي فيها، وهي طبعا ست باين عليها انها ناجحه وذكويه وقويه وبتاخذ قرارات جامدة ومستقلة، وهي عندها 28 سنة، وباين عليها ان لها حضور، على الأقل حضور عملي في الحياة

د. فوزى شحاتة: هي بتقول إن الناس اللي هي بتشتغل معاهم يقولوا انها شاطره في الشغل

د. يحيى: شاطره من غير مكسب ؟

د. فوزى شحاتة: هي بتكسب جنب الخساره برضه

د. يحيى: ما هي دي لازم تفحصها قوى، لما تفحصها بدقة، يمكن تفهم أكثر، يعني لما حد يقولك أحمد بهجت سالف 600 مليون دولار يمكن بيكسب 800 مليون دولار، يبقى مالناش دعوة، هنا لازم ترجع تفحص الحكاية بدقة كل شوية عشان نتعرف علي مستجدات الواقع باستمرار، ساعتها تبقى عارف أكثر وأكثر، انت بتشتغل مع مين، وكلام من ده، لما تقيس الشخصية والواقع والظروف المحيطة بالفلوس في السن دي، 28 سنه، لازم تندهش وهيه ست في مجتمع زي ده، بتشتغل من سن 22 سنة، انت اكبر منها بـ3 سنين. وأديك أهه: "ربي كما خلقتني"، تقوم يمكن تتعلم إزاي تستلف وتروح في ستين داهيه، يمكن تكتب شيك بدون رصيد وانت ما انتش عارف يعني إيه شيك من أصله (ضحك)

انا اظن يا ابني دي حاله صعبه فعلا ومع ذلك: طالما هي بتيجي، أديك بتدي اللي عندك، وإلا حيتفضلها ايه يعني؟! أنت حتكمل، وتعاطفك معاها انا شايفه ايجابي برغم كل الظروف، يعني يا أخي كمان انت مش حاتتعاطف انت كمان؟ انا شايف ان ده محوَّفك أحسن يكون ده حايزود سلبياتها، عندك حق، لكن ماهو ده حقها برضه، حتى اهلهيا بياخدوا منها، مابيدوش، وانت قلت هي اللي بتصرف على البيت، يعني ما ينفعش تنتظر منهم حاجة كبيرة، مش حايدوها حاجة أساسية هي محتاجها، فانت موقفك طيب محترم، وده موقف جيد، موقف علاجي جيد، وطيب، لما تخاف أكثر لحسن يحصل مضاعفات من موقفك ده، يعني انها تسئ فهمه مثلا، أو تسئ استعماله بإنها تبرر اللي هي بتعمله بأنها عيانه مثلا، هنا يبقى نرجع نقف ونتساءل من أول وجدديد، دا اللي محتاج التساؤل من جديد، ما هو مش معقول في الظروف الصعبة الحالية أحاسب نفسي كده هو انا اتعاطف ولا ما اتعاطفش، امال مين اللي حاتتعاطف!

وادى احنا مع بعض وتبقى تقولنا اللي أنت عايزه لما يجد جديد.

أرسل تعليقا

TheManAndEvolution-FORUM@arabpsynet.com

http://www.rakhawy.org/a_site/everyday/sendcomment/index.html

The Man & Evolution FORUM Web Site

<http://fr.groups.yahoo.com/group/TheManAndEvolutionForum/>

All Interventions: The Man & Evolution FORUM Messages

<http://fr.groups.yahoo.com/group/TheManAndEvolutionForum/messages/1>

Pr. Yahia Rakhawy Web Site

http://www.rakhawy.org/a_site